

Buiséad fadtéarmach: ‘Tá an easpa fritograí ar thaobh na Comhairle ina cúis leis na moilleanna’



Tionólfar an cruinniú mullaigh sa Bhruiséil an 1-2 Deireadh Fómhair 2020

Ag cruinniú mullaigh an 1 Deireadh Fómhair 2020, chuir an tUachtarán David Sassoli i bhfáth nach bhfuil bac á chur ag an bParlaimint ar an idirbheartaíocht maidir le buiséad AE 2021-2027.

An 1-2 Deireadh Fómhair, tá ceannairí an Aontais ag teacht le chéile ag [cruinniú mullaigh na Comhairle Eorpaí](#) sa Bhruiséil. Ag labhairt dó ag tús an chruinnithe, dúirt Uachtarán na Parlaiminte David Sassoli go gcaithfear “Eoraip níos freagrúla, níos cuimsithí, níos féarálte a chruthú, Eoraip a théann chun sochair do shaoránaigh an Aontais ar bhealach nithiúil”. “Tá sé de dhualgas orainn coinneáil orainn agus gan misneach a chailleadh,” dúirt sé.

Téarnamh iar-ghéarchéime

Labhair sé faoina thábhachtaí atá sé an margadh aonair a athbhunú i bhfianaise [ghéarchéim an choróinviris](#), chomh maith le borradh a chur faoi gheilleagair na hEorpa agus [faoin bhfostaíocht](#). D'iarr sé ar cheannairí na mballstát aghaidh a thabhairt ar an neamhionannas sóisialta agus eacnamaíoch atá ann san Eoraip agus freastal ar riachtanais na daoine sin is mó atá buailte ag an bpaindéim.

Cháin sé na ceannairí rialtais mar gheall ar “na moilleanna do-ghlactha” atá tar éis a bheith ann i gcinnteoireacht an Aontais a mhéid a bhaineann leis an imirce. D'fhógair an Coimisiún Eorpach [comhaontú nua maidir le himirce agus tearmann](#) an mhí seo caite, agus chuir an tUasal Sassoli in iúl gur “chéim chun cinn” atá ann agus go bhfuil feisirí na Parlaiminte réidh le tús a chur le caibidlíocht leis an gComhairle agus le huachtaránacht na Gearmáine ar an ábhar.

Buiséad fadtéarmach an Aontais

Maidir leis an idirbheartaíocht faoi [bhuiséad an Aontais don tréimhse 2021-2027](#), thug an tUachtarán le fios nach bhfuil moltaí curtha ar fáil ag an gComhairle: “Ba mhaith liom a bheith thar a bheith soiléir mar tá cuid den cháineadh atá á dhéanamh go hiomlán do-ghlactha: níl rud ar bith á bhlocáil ag an bParlaimint. Is chun leasa shaoránaigh an Aontais iad éilimh na Parlaiminte. Tá an easpa fritograí ar thaobh na Comhairle ina cúis leis na moilleanna.”

D'iarr sé ar uachtaránacht na Gearmáine moltaí nithiúla a chur ar fáil maidir leis na nithe seo a leanas: maoiniú do chlár shuaitheanta AE a ráthú, [foinsí nua ioncaim](#) a mholadh chun a chinntiú go mbeifear in ann aisíocaíochtaí ionstraim théarnaimh Covid-19 a mhaoiniú gan ualach a chur ar cháiniocóirí, agus sásra éifeachtach a bhunú chun buiséad AE a chosaint i gcás ina bhfuil an smacht reachta á bhagairt.

Gnóthaí eachtracha

Rinne an tUachtarán trácht chomh maith ar an teannas atá ann in Oirthear na Meánmhara mar gheall ar ghníomhaíochtaí na Tuirce, chuir sé in iúl go dtacaíonn Parlaimint na hEorpa go daingean leis an gCipir agus leis an nGréig. A mhéid a bhaineann leis an mBealarúis, d'iarr sé ar AE “smachtbhannaí a chur láithreach bonn orthu sin atá freagrach as calaois toghcháin, foréigean agus cos ar bolg” sa tír.